

Pol da Pilimon do Papia Mandagit

But piso gen

Pilimon unun man bini torj amin kinda. Unun Kolosi kokup pap dakon Yesu yolyol amin kinda. Oman monjini kinda mani Onesimus unun amin madepni yipmaj degek pasal kiñ kokup kindakon egipgut. Unun kokup papmon Onesimus Pol anjalon anek Yesu yolyol amin dagagit.

Unun bisapmon Pol dam tebanon egipgut, do Pilimon aripmi dima kiñ kosak. Mani on papia mandaj Onesimus do iban madepnikon anjigit. Rom dakon gen teban da oman monji kinda pasal kisak kañ, madepni da tagi anjakban kimotjak do yosok. Mani unun papiagwan Pol da Pilimon oman monjini tebai dima iyisak do mandagit. Oman monjini unun Yesu yolyol amin kili dagak, do notnosi yarjon da abidosak.

Pilimon dakon oman monji pasal kigit da don Yesu yolyol amin daganban, Pol da yabekban tobi ae Pilimon do kigit

¹ Nak Pol, Yesu Kristo yoldat do anek dam tebanon egisat. Nak gat ae notnin Timoti, nit da papia on Pilimon gak do mandamak. Gak notnin tagisi ae pi isalnin. ² Nit papia on saminin Apia kisi do mandamak. Ae Akipus Yesu do anek yokwi pabiñ yop do nin gat kalonj emat amañ ununyo kisi do mandamak. Ae panmuwukbi Pilimon gak da yutnon muwuk muwuk an unun kisi do mandamak. ³ Nit Pijkop Datnin, ae Amin Tagi Yesu Kristo, unun da nandan yawot an daminek butji panyawot aban yawori tosak do bisit amak.

Pilimon dakon anpakni tagisi do Pol but galaksi nandagit

⁴ Bisapmi bisapmi bisit asaron, nak gak do nandarek Piŋkopno ya yaŋ iyisat. ⁵ Nido, toktogisi amin da yaŋ nayan, gak Amin Tagi Yesu nandan gadan imiŋ kimokdol, ae Piŋkop dakon miŋat aminyo but dasi galak taŋ yomiŋ kimokdol. ⁶ Piŋkop da gak anpuluganban yipman deri mini miŋat aminyokon Yesu do nandan gadat asal unun yaŋ tenjenok abi do Piŋkop bisit iyisat. Yaŋ anjaki Kristo da yo morap tagisi nimisak unun do pakyaŋsi nandaki. ⁷ Not, gak Piŋkop dakon miŋat aminyo morap but dasi galak taŋ yomiŋ kimagek butni panjeban asal. Yaŋ anjaki unun da kisik kisik madepsi naminjakwan butno yaworisi tosok.

Pilimon da Onesimus notnosi yaŋon da abidosak

⁸ Yo kaloŋsi kinda abi do nandisat. Kristo da manon unun si abi do nak da tebai tagi gayiken. Mani, anpak tagisi asal unun nandisat, ⁹ do gen tebai dima gayiken. Amin do but dasi galak taŋ yomyom anpak da nit kisi timikdak, do nak gen yaworisok gayiken. Nak Pol, Yesu Kristo dakon gen yaŋ tenjenok asat, ae Kristo dakon pi unun do anjek dam tebanon egisat. ¹⁰ Monjino Onesimus do anpak tagisi an ibi do gayisat. Dam tebanon egapbo Onesimus nagon apgut bisapmon, nak da Kristo bamisi nandan gadan imjak do anpulugagim. Do unun monjinosi yombem agit. ¹¹ Kalip gak anpulugok do pi tagi dima agit. Mani abisok pi tagisi anjek gak gat ae nak gat kisi tagisi panpulugokdisak.

¹² Abisok yabekgo nak dakon but gat kisi gagon tobil obisak. ¹³ Abisok Gen Bin Tagisi yaŋ tenjenok dakon pi do anjek dam teban amin egisat bisapmon abidoko gak da tamokon pi asak kaŋ, nak unun do tagisi nandaken. ¹⁴ Mani gak dakon yaŋ dagok dima kaŋek yo kinda dima

aberj. Gak da idon egek nak anpulgusak do nandisal kanj unjun gak dakon galak tok. Nak tebai dima gayikerj. ¹⁵ Asi, Onesimus bisap pisipmisok gepmanj dekgit. Mani yo unjun noman tanj imgut, unjun gak da yokwikon nanj ae abidanjbi gak gat toktogisi egipjil do bo noman tagit. ¹⁶ Abisok unjun gak dakon oman monjigin dima. Asi unjun gak dakon oman monjigo egisak, mani abisok gak dakon notgosi dagak do but dasi galak tanj ibi. Naga koko notnosi aban but dasi abidosot. Mani nandisat, gak da but dasi galak tanj iminj kimotdisal. Oman monji pini aban kanj galaktokdisal, ae Kristo do anjek gak da kanjbi notgosi anjakwan but dasi galak tanj iminj kimotdisal.

¹⁷ Do Kristo da pikon nit kalonjisi ekwamak yanj kosol kanj, nak opbo but dasi nianj abidanjbim, Onesimus do yanj gin abi. ¹⁸ Gagon gulusurj di agit, bo ae gagon goman di agit kanj, mani kulabik anjek unjun gomanon nak dakon man mandaki. ¹⁹ Nak Pol da naga dakon kisit da papia on mandisat. Nak da naga goman unjun sopberj. Mani nandaki! Nak da gen bami gayiko nandanj gadat agil, do gak nagon gomango toj. Goman unjun gaga dakon egip egipgo. Mani unjun do dima yokerj. ²⁰ Not, nandaki. Amin Tagi da manon gak anpak tagi on nak do abi do nandisat. Nit Yesu Kristo dakon amin ekwamak do unjun anpak anjek nak dakon but anteban abi.

²¹ Papia on mandanek yanjsi nandisat, gak da nak dakon gen on guramitdisal. Nak nandisat, Onesimus do anpak akdisal, unjun da anpak abi do gayisat unjun yapdisak.

²² Ae nak gen kinda gat tosok. Nak Pirjkop da ji dakon bisit nandakdisak, anjek nak nepban jikon tobil apdisat yanjsi nandanj gadasat. Do yutgokon yut buri kinda nak da pokgerj do anjroman abi.

Pol dakon pi isalni da Pilimon do gildatni tagi yipman iman

²³ Epapras da gildat tagi yan gayisak. Unun kisi Yesu Kristo do anek dam tebanon ekwamak. ²⁴ Nak dakon pi isalno, unun Mak, ae Aristakus, ae Demas ae Luk ununyo kisi da gildat tagi yan gaya.

²⁵ Amin Tagi Yesu Kristo dakon nandan yawot da ji dakon wup gat egipjak do bisit asat.

PIŃKOP GEN
The New Testament and Psalms in the Yopno Language of Papua
New Guinea
Nupela Testamen na Buk Song long tokples Yopno long Niugini
copyright © 2010 Wycliffe Bible Translators, Inc.

Language: Yopno

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-01-09

PDF generated using Haiola and XeLaTeX on 19 Oct 2021 from source files dated 17 Oct 2021

b683ce50-d820-5bfc-8471-d8ee080be106